

P A R D O N

*Nel corso di una gita, il trovarsi in ambienti ... inconsueti,
tra tappeti, specchi e lampadari, unitamente alla stanchezza
del viaggio ... e lo stomaco vuoto, possono giocare
qualche brutto scherzo.*

A l'eva 'n ristorante da quij cun quatar stell,
un siit propi scernii, adatt al nost livell;
dopu da vess passaa a fa i facc in 'ra "toilette"
a gh'eva 'n curiduur cun giò tutt la "moquette",
in aria lampadari da vedar e ciapitt,
i mür tutt rivestii da specc fin'al sufitt,
che cunt i so rifless pareva, a guardà dent,
da vess in d'un salun, in mezz a 'n mücc da gent.

Intant vegneva in scià, a cò bass, una sciureta
ciapava a rügà dent in fund ala burzeta,
forzi par ripassass ul trücc cunt ul russett,
opür par rinfressass un zicch cul fazzulett.

All'impruvviis la tröva quell ca l'è 'dré a cercà,
la svalza 'l cò cuntenta, e ... patatracch!...
'na vaca d'una bota propi in la frunt dul cò
(ca gh'è vurzüü 'n mument a riturnà in sü i so),
- oh, scusi – la ga fà a quela dananz – pardon! –
pö l'è vegnüva rossa fina al scimin di urecc:
quel'altra ... l'eva lee ... dent in dul specc!

Natale Gorini